





e) druge pripadajuće troškove vezane za poslove iz člana 23. ovog zakona.

(2) Sredstva potrebna za rad Uprave policije koja nisu obuhvaćena stavom (1) ovog člana, osiguravaju se na budžetskoj poziciji Ministarstva.

(3) Za obavljanje određenih poslova iz člana 23. tačke b) i c) ovog zakona formira se specijalna kasa, za koju se finansijska sredstva osiguravaju u okviru budžetskih sredstava Uprave policije iz stava (1) ovog zakona.

(4) Izvještaj o utrošku sredstava iz specijalne kase razmatra Vlada Unsko-sanskog kantona (u daljem tekstu: Vlada Kantona) jednom godišnje na zatvorenoj sjednici.

(5) Na prijedlog policijskog komesara, ministar Ministarstva unutrašnjih poslova Unsko-sanskog kantona (u daljem tekstu: ministar) pravilnikom propisuje uvjete, način i postupak korištenja odobrenih finansijskih sredstava iz specijalne kase, kao i druga pitanja koja su od značaja za zakonito korištenje ovih sredstava.

(6) Vlada Kantona i ministar dužni su osigurati sve uvjete za samostalan i nesmetan rad Uprave policije radi efikasnog obavljanja svih poslova iz njene nadležnosti i omogućiti Upravi policije da samostalno koristi sredstva za rad.

## **Član 7.**

### **(Pripreme i izvršenje budžeta)**

(1) Zahtjev za budžetska sredstva Uprave policije priprema policijski komesar i dostavlja ministru.

(2) Zahtjev za dodjelu budžetskih sredstava Ministarstva, uključujući i sredstva iz stava (1) ovog člana, ministar dostavlja Vladi Kantona, putem Ministarstva finansija Unsko-sanskog kantona (u daljem tekstu: Ministarstvo finansija), na dalje postupanje.

(3) Na procedure pripreme i podnošenja zahtjeva za budžetska sredstva Ministarstvu i Upravi policije, kao i druga pitanja koja se odnose na odgovornost za računovodstvo, internu

kontrolu, nadzor i zakonitost raspolaganja budžetskim sredstvima, shodno se primjenjuju odredbe posebnih propisa kojima su uređena navedena pitanja.

## **POGLAVLJE II – UNUTRAŠNJI POSLOVI IZ NADLEŽNOSTI KANTONA**

### **Član 8.**

#### **(Unutrašnji poslovi)**

Unutrašnji poslovi iz nadležnosti Kantona su:

- a) zaštita života, imovine, kao i drugih prava i sloboda utvrđenih ustavima u Bosni i Hercegovini;
- b) sprečavanje, otkrivanje i istraga krivičnih djela i prekršaja na području Kantona, u skladu sa zakonom;
- c) traganje za počiniocima krivičnih djela i prekršaja i njihovo dovođenje nadležnim organima;
- d) prikupljanje i analiziranje informacija i podataka iz tačke b) i c) ovog člana, kao i o ukupnoj sigurnosnoj situaciji u Kantonu iz nadležnosti Ministarstva;
- e) održavanje javnog reda i mira;
- f) osiguranje javnog okupljanja;
- g) osiguranje određenih ličnosti i objekata na području Kantona;
- h) kriminalističko – tehnička vještačenja;
- i) nadzor, kontrola i regulisanje saobraćaja na putevima Kantona, te drugi poslovi u oblasti saobraćaja propisani zakonom i podzakonskim aktima;
- j) izdavanje odobrenja za nabavljanje, držanja i nošenje oružja i municije, vođenja propisanih evidencija, te kontrola istih i poslovi kontrole kretanja oružja i vojne opreme na području Kantona;
- k) vođenje statističkih, operativnih i drugih službenih evidencija potrebnih za obavljanje policijskih poslova, u skladu sa zakonom i drugim propisima;
- l) razmjena informacija sa tužilaštvima, sudovima i drugim policijskim organima u Bosni i Hercegovini;

- m) saradnja sa drugim sigurnosnim agencijama i drugim organima u Bosni i Hercegovini, u okviru izvršavanja policijskih poslova;
- n) pružanje pomoći organima u Bosni i Hercegovini i pravnim licima kojima je povjereno vršenje javnih ovlaštenja u skladu sa posebnim propisima;
- o) poduzimanje hitnih mjera koje su neophodne za otklanjanje direktne opasnosti za ljude i imovinu, kada te mjere ne mogu pravovremeno poduzeti nadležni organi na području Kantona;
- p) policijski poslovi koje Federalna uprava policije povjeri Upravi policije iz svoje nadležnosti;
- r) policijski poslovi iz nadležnosti Ministarstva povjereni od strane tužilaštava u Bosni i Hercegovini;
- s) planiranje i izvršavanje programa u okviru načina rada policije u zajednici, s ciljem identifikovanja i rješavanja problema u zajednici;
- t) poslovi izdavanja, poništavanja i zamjene ličnih karata i jedinstvenog matičnog broja građana i vođenja evidencija;
- u) poslovi izdavanja, poništavanja, zamjene i oduzimanja putnih isprava;
- v) registracija motornih vozila i vođenje evidencija;
- z) poslovi izdavanja i zamjene vozačkih dozvola i vođenje evidencija;
- aa) poslovi prijavljivanja, odjavljivanja i vođenja evidencije o prebivalištu i boravištu građana;
- bb) čuvanje duplikata matičnih knjiga u elektronskom obliku i inspeksijski nadzor nad primjenom propisa u oblasti matičnih knjiga;
- cc) promjena ličnog imena;
- dd) poslovi koji se odnose na sticanje državljanstva Federacije Bosne i Hercegovine i promjene entitetskog državljanstva;
- ee) rješavanje u drugostepenom upravnom postupku iz nadležnosti Ministarstva;
- ff) poslovi inspeksijskog nadzora zaštite od požara iz nadležnosti Ministarstva u skladu sa posebnim propisima;
- gg) poslovi inspeksijskog nadzora i poslovi koji se odnose na rad agencija za zaštitu ljudi i imovine;
- hh) drugi inspeksijski nadzor u oblasti unutrašnjih poslova;
- ii) nadzor nad zakonitošću rada udruženja koja obavljaju djelatnosti iz oblasti u kojoj je praćenje stanja u nadležnosti Ministarstva;
- jj) poslovi koji se odnose na promet i skladištenje eksplozivnih, zapaljivih i ostalih opasnih materija koji su u nadležnosti Kantona;
- kk) obavljanje drugih poslova i zadataka koje Federalno ministarstvo povjeri Ministarstvu iz svoje nadležnosti;
- ll) saradnja sa drugim organima u Bosni i Hercegovini u izvršavanju unutrašnjih poslova;
- mm) drugi poslovi stavljeni u nadležnost Ministarstva, u skladu sa zakonom i drugim propisom koji se odnose na nadležnost Kantona u ovoj oblasti.

## Član 9.

### (Izvjštavanje o radu Ministarstva i Uprave policije)

(1) Ministar je obavezan dva puta godišnje, a po potrebi i češće, podnositi izvještaj o radu Ministarstva koji obuhvata i dio pitanja iz nadležnosti rada Uprave policije koji izrađuje ta uprava.

(2) Izvještaj iz stava (1) ovog člana podnosi se Vladi Kantona, a Vlada Kantona Skupštini Unsko-sanskog kantona (u daljem tekstu: Skupština Kantona).

(3) Odluke i smjernice Vlade Kantona i Skupštine Kantona provodi ministar i policijski komesar, u skladu sa ovim zakonom.

(4) Izvještaj iz stava (1) ovog člana može se odnositi i na pojedinačne slučajeve ako to zatraže organi iz stava (2) ovog člana, ako zakonom nije drukčije određeno ili ne ugrožava operativni rad Uprave policije.

(5) Ministarstvo i Uprava policije obavještavaju javnost o događajima i pojavama koja su od značaja za javnost iz svoje nadležnosti kao i o mjerama poduzetim za rješavanje tih pitanja.

(6) Obavještanje javnosti iz stava (5) ovog člana obavlja se putem sredstava javnog informiranja, kao i na drugi pogodan način.

(7) Obavještanje javnosti obavljaju ministar i policijski komesar ili osobe koje oni ovlaste.

(8) Predmet obavještanja javnosti ne mogu biti podaci koji su prema Zakonu o zaštiti tajnih podataka određeni po stepenu tajnosti, kao i informacije o poduzetim i planiranim istražnim radnjama bez odobrenja nadležnog tužilaštva.

#### **Član 10.**

##### **(Zajednička nadležnost i povjereno vršenje poslova)**

(1) U slučaju kada je Ministarstvu povjereno vršenje poslova iz nadležnosti Federacije ili prilikom vršenja poslova iz zajedničke nadležnosti Federacije i Kantona, Ministarstvo neposredno primjenjuje zakone i druge propise Federacije.

(2) Federalno ministarstvo unutrašnjih poslova nadzire sprovođenje propisa iz stava (1) ovog člana.

#### **Član 11.**

##### **(Rješavanje sukoba nadležnosti između Federalnog ministarstva unutrašnjih poslova i Ministarstva)**

(1) U slučaju sukoba nadležnosti između Federalnog ministarstva unutrašnjih poslova i Ministarstva i između drugog kantonalnog ministarstva unutrašnjih poslova (u daljem tekstu: kantonalno ministarstvo) i Ministarstva, Ustavni sud Federacije Bosne i Hercegovine riješit će to svojom odlukom.

(2) Ako je potrebno hitno postupiti radi sprečavanja nastanka neotklonjivih štetnih posljedica do odluke Ustavnog suda Federacije Bosne i Hercegovine primjenjivat će se odluka koju donosi ministar Federalnog ministarstva unutrašnjih poslova.

(3) Kada ministar Federalnog ministarstva unutrašnjih poslova donese odluku iz stava (2) ovog člana, dužan je o tome odmah obavijestiti

premijera Vlade Federacije Bosne i Hercegovine i ministra kantonalnog ministarstva na kojeg se ta odluka odnosi.

#### **Član 12.**

##### **(Ličnosti i objekti pod posebnim osiguranjem)**

Vlada Kantona uredbom određuje koje se ličnosti i objekti Kantona posebno osiguravaju.

#### **Član 13.**

##### **(Postupanje policijskih službenika prema osobama lišenim slobode)**

Na prijedlog policijskog komesara, ministar će donijeti propis kojim će urediti način postupanja policijskih službenika prema osobama koje, u skladu sa zakonom, policijski službenici liše slobode.

#### **Član 14.**

##### **(Pružanje pomoći drugim organima i pravnim licima)**

(1) Uprava policije pruža pomoć drugim organima, preduzećima i drugim pravnim licima kojima je povjereno vršenje javnih ovlaštenja, radi osiguranja izvršenja poslova iz njihove nadležnosti, ako se prilikom izvršenja tih poslova i zadataka pruži fizički otpor ili se takav otpor može osnovano očekivati.

(2) O načinu i obimu pružanja pomoći u skladu sa stavom (1) ovog člana odlučuje načelnik policijske uprave, prema mjestu pružanja pomoći. Ukoliko se pomoć pruža na području više policijskih uprava, o pomoći odlučuje načelnik Sektora uniformisane policije.

(3) Kada ocijeni da se prilikom pružanja pomoći iz stava (1) ovog člana može očekivati organizirani masovni fizički otpor ili upotreba oružja, načelnik nadležne policijske uprave odnosno načelnik Sektora uniformisane policije je dužan, prije donošenja odluke iz stava (2) ovog člana, pribaviti pismenu saglasnost policijskog komesara.

(4) Način i obim pružanja pomoći, kao i postupanje policijskih službenika, detaljnije propisuje ministar podzakonskim propisom na prijedlog policijskog komesara.



**Član 15.****(Pružanje pomoći u vanrednim situacijama)**

Uprava policije pruža pomoć organima uprave, jedinicama lokalne samouprave, pravnim i fizičkim licima i u slučajevima opće opasnosti uzrokovane prirodnim nepogodama, epidemijama i drugim vanrednim okolnostima.

**Član 16.****(Naoružanje Uprave policije)**

Vlada Kantona, na prijedlog ministra, uz pribavljeno mišljenje policijskog komesara, donosi propis o vrsti i količini naoružanja i opreme Uprave policije.

**Član 17.****(Izgled, obilježavanje i upotreba vozila Uprave policije i Ministarstva)**

Ministar, uz pribavljeno mišljenje policijskog komesara, donosi propis kojim se uređuju izgled, obilježavanje i upotreba vozila Uprave policije i Ministarstva.

**POGLAVLJE III – UNUTRAŠNJA ORGANIZACIJA I NADLEŽNOST MINISTARSTVA****Odjeljak A. Unutrašnja organizacija****Član 18.****(Unutrašnja organizacija Ministarstva i Uprave policije)**

Unutrašnja organizacija Ministarstva i Uprave policije uređuje se Pravilnikom o unutrašnjoj organizaciji Ministarstva (u daljem tekstu: Pravilnik), u skladu sa ovim zakonom i drugim propisima.

**Član 19.****(Pravilnik o unutrašnjoj organizaciji)**

(1) Pravilnik donosi ministar, uz saglasnost Vlade Kantona.

(2) Dio Pravilnika koji se odnosi na Upravu policije utvrđuje ministar, na prijedlog policijskog komesara.

(3) Pravilnikom se utvrđuju:

a) organizacione jedinice i njihova nadležnost;

b) sistematizacija radnih mjesta, koja obuhvata: naziv radnog mjesta, opis poslova, uvjete za obavljanje poslova, čin za radna mjesta policijskih službenika, vrstu djelatnosti, naziv grupe u koju spadaju poslovi, složenost poslova i druge elemente;

c) način rukovođenja Ministarstvom, Upravom policije i njihovim organizacionim jedinicama;

d) programiranje i planiranje poslova;

e) ovlaštenja i odgovornosti rukovodećih državnih i policijskih službenika, prilikom obavljanja poslova iz svoje nadležnosti;

f) broj pripravnika koji se primaju u radni odnos i uvjeti za prijem pripravnika za radna mjesta državnih službenika i namještenika;

g) druga pitanja od značaja za organizaciju i način rada Ministarstva.

**Odjeljak B. Osnovne organizacione jedinice Ministarstva****Član 20.****(Osnovne organizacione jedinice)**

(1) Ministarstvo poslove i zadatke iz svoje nadležnosti obavlja u okviru osnovnih organizacionih jedinica koje se utvrđuju Pravilnikom.

(2) Unutar osnovnih organizacionih jedinica, ministar može utvrditi unutrašnje organizacione jedinice, kako bi se na adekvatan i efikasan način osiguralo vršenje poslova iz nadležnosti rada osnovnih organizacionih jedinica Ministarstva.

**Član 21.****(Nadležnosti organizacionih jedinica Ministarstva)**

U okviru poslova iz člana 8. ovog zakona, Ministarstvo preko svojih osnovnih organizacionih jedinica, obavlja sljedeće poslove:

a) izdavanje, poništavanje i zamjena ličnih karata i jedinstvenog matičnog broja građana i vođenje evidencija;

b) izdavanje, poništavanje i zamjena putnih isprava;

- c) izdavanje i zamjena vozačkih dozvola;
- d) registracija motornih vozila;
- e) promjena ličnog imena;
- f) ažuriranje i čuvanje duplikata matičnih knjiga i nadzor nad primjenom propisa u oblasti matičnih knjiga;
- g) sticanje državljanstva Federacije i promjena entitetskog državljanstva;
- h) prijavljivanje, odjavljivanje i vođenje evidencija o prebivalištu i boravištu građana;
- i) poslovi inspekcijskog nadzora u oblasti zaštite od požara iz nadležnosti Ministarstva;
- j) poslove koji se odnose na rad agencija za zaštitu ljudi i imovine i unutrašnjih zaštitarskih službi i inspekcijski nadzor u navedenoj oblasti;
- k) inspekcijski nadzor u oblastima iz svoje nadležnosti;
- l) druge poslove propisane zakonom.

### **Odjeljak C. Uprava policije**

#### **Član 22.**

##### **(Unutrašnja organizacija Uprave policije)**

(1) Osnovne organizacione jedinice Uprave policije su:

- a) Ured policijskog komesara;
- b) Sektor uniformisane policije;
- c) Sektor kriminalističke policije;
- d) Sektor za planiranje, analitiku, statistiku i koordinaciju;
- e) Jedinica za profesionalne standarde, unutrašnju kontrolu i reviziju;
- f) Sektor za informacijsko-komunikacijske tehnologije;
- g) policijske uprave.

(2) Ako je to neophodno i adekvatnije odgovara prirodi određenih poslova, pored osnovnih organizacionih jedinica iz stava (1) ovog člana, ministar može na prijedlog policijskog komesara u Pravilniku utvrditi i druge osnovne organizacione jedinice u Upravi policije, koje će na odgovarajući način osigurati vršenje poslova i zadataka u skladu s članom 53. stav 2. Zakona o organizaciji organa uprave u Federaciji Bosne i Hercegovine.

(3) Unutar osnovnih organizacionih jedinica, Pravilnikom se mogu utvrditi unutrašnje organizacione jedinice, kako bi se na adekvatan i efikasan način osiguralo vršenje poslova iz nadležnosti osnovnih organizacionih jedinica Uprave policije.

#### **Član 23.**

##### **(Nadležnosti Uprave policije)**

U okviru poslova iz člana 8. ovog zakona, Uprava policije preko svojih organizacionih jedinica, obavlja slijedeće poslove:

- a) zaštita života i imovine, kao i drugih prava i sloboda utvrđenih ustavima u Bosni i Hercegovini;
- b) spečavanje, otkrivanje i istraga krivičnih djela i prekršaja na području Kantona u skladu sa zakonom;
- c) traganje za počiniocima krivičnih djela i prekršaja i njihovo dovođenje nadležnim organima;
- d) prikupljanja i analize informacija i podataka iz tačke b) i c) ovog člana, kao i o ukupnoj sigurnosnoj situaciji u Kantonu;
- e) poslove i zadatke koji se odnose na održavanje javnog reda i mira;
- f) poslove i zadatke koji se odnose na održavanje javnih okupljanja;
- g) osiguranje posebno određenih ličnosti i objekata Kantona;
- h) kriminalističko-tehnička vještačenja;
- i) kontrola i regulacija saobraćaja na putevima Kantona, te drugi poslovi u oblasti saobraćaja propisani zakonom;
- j) poslove izdavanja odobrenja za nabavljanje, držanje i nošenje oružja i municije, vođenje propisanih evidencija i vršenje i drugih poslova i zadataka na osnovu propisa o nabavljanju, držanju i nošenju oružja i municije;
- k) poslove koji se odnose na oblast proizvodnje, prometa i skladištenja eksplozivnih, zapaljivih i opasnih materija iz nadležnosti Kantona;
- l) vođenje kaznenih i prekršajnih evidencija i ustupanje istih nadležnim organima u skladu sa važećim zakonima i propisima i vođenje drugih

- službenih evidencija potrebnih za obavljanje zadataka iz nadležnosti Uprave policije u skladu sa važećim zakonima i propisima;
- m) razmjene informacija sa tužilaštvima, sudovima i drugim policijskim organima u Bosni i Hercegovini;
- n) saradnja sa drugim policijskim organima, sigurnosnim agencijama i drugim organima u Bosni i Hercegovini, u okviru nadležnosti Uprave policije;
- o) pružanje pomoći drugim državnim organima i pravnim licima kojima je povjereno vršenje javnih ovlaštenja u skladu sa posebnim propisima;
- p) druge poslove i zadatke policije koje Upravi policije povjere tužilaštva u Bosni i Hercegovini;
- r) poslove modernizacije i opremanja za informacioni i radio-relejni sistem Ministarstva i izrada projekata računarske obrade podataka;
- s) druge poslove i zadatke utvrđene zakonom i drugim propisima.
- f) organizuje rad Ministarstva;
- g) osigurava zakonito i efikasno funkcioniranje Ministarstva;
- h) odlučuje u upravnim stvarima na način propisan zakonom;
- i) organizuje jedinstven sistem izvještavanja i obrade podataka u oblasti unutrašnjih poslova neophodnih za vršenje poslova Ministarstva;
- j) osigurava saradnju Ministarstva sa drugim državnim organima u Bosni i Hercegovini;
- k) izvršava i druge poslove i zadatke koje mu povjeri Vlada Kantona, kao i druge poslove utvrđene zakonima Kantona, Federacije i Bosne i Hercegovine.

(3) Prema osnovnim organizacionim jedinicama Ministarstva, ministar:

- a) upravlja i usmjerava obavljanje poslova iz nadležnosti organizacionih jedinica;
- b) obrazuje upravne i druge stručne komisije i odgovarajuća radna tijela;
- c) odlučuje o korištenju sredstava i vrši nabavku opreme i materijalno-tehničkih sredstava, osim sredstava utvrđenih za namjene iz člana 6. ovog zakona;
- d) odlučuje o pravima, obavezama i odgovornostima državnih službenika, namještenika i zaposlenika Ministarstva, osim onih za koje je nadležan policijski komesar, u skladu sa ovim zakonom i drugim propisima;
- e) izvršava druge poslove i zadatke koje mu povjeri Vlada Kantona, kao i druge poslove utvrđene zakonom.
- (4) Za vršenje određenih poslova iz st. (2) i (3) ovog člana ministar može prenijeti svoja ovlaštenja sekretaru Mnistarstva ili rukovodiocima osnovnih organizacionih jedinica.

(5) Prema Upravi policije ministar je ovlašten da:

## POGLAVLJE IV – RUKOVOĐENJE

### Odjeljak A. Rukovođenje Ministarstvom.

#### Član 24.

##### (Ovlaštenja ministra u rukovođenju Ministarstvom)

- (1) Ministarstvom rukovodi ministar.
- (2) U cilju provođenja kantonalne politike i prioriteta u vezi sa unutrašnjim poslovima, provođenja kantonalnih zakona i izvršavanja zadataka povjerenih od strane Vlade Kantona, pored poslova utvrđenih drugim zakonima, ministar:
- a) predstavlja Ministarstvo;
- b) vrši nadzor nad provođenjem zakona i drugih propisa iz nadležnosti Ministarstva;
- c) utvrđuje prioritete i politiku Ministarstva;
- d) predlaže donošenje zakona i drugih propisa iz nadležnosti Ministarstva;
- e) donosi provedbene propise, druge opće i pojedinačne akte iz svoje nadležnosti u svrhu provođenja zakona i drugih propisa u oblasti unutrašnjih poslova;

- a) na prijedlog policijskog komesara donosi podzakonske propise i druge opće i pojedinačne akte za koje je zakonom ovlašten;
- b) prati rad policijskog komesara;
- c) utvrđuje politike i prioritete u vezi sveobuhvatnih sigurnosnih pitanja;



- d) daje svoje izjašnjenje na predloženu godišnju ocjenu o radu policijskog komesara na način predviđen u članu 49. ovog zakona;
- e) na prijedlog policijskog komesara usvaja plan policijskih poslova Uprave policije;
- f) vrši druga ovlaštenja koja su mu ovim zakonom i drugim propisima data u nadležnost.

(6) Prigovor koji se izjavljuje na rješenje kojim se odlučuje o pravima i dužnostima zaposlenika Ministarstva, prema ovom zakonu, ne odlaže izvršenje rješenja.

## Član 25.

### (Zamjena ministra)

(1) U slučaju privremene spriječenosti ministra do 30 dana, funkciju ministra vrši sekretar Ministarstva, a kada se razmatraju materijali iz nadležnosti Ministarstva sjednicama Vlade Kantona prisustvuje sekretar Ministarstva bez prava glasa.

(2) Ukoliko ministar, zbog odsustva ili drugih stvarnih ili pravnih razloga, ne može vršiti svoju funkciju duže od 30 dana, funkciju ministra vrši član Vlade Kantona kojeg odredi premijer, dok on ne bude u stanju da ponovo preuzme funkciju ili dok se ne imenuje novi ministar.

## Odjeljak B. Rukovođenje Upravom policije

### Član 26.

#### (Ovlaštenja policijskog komesara u rukovođenju Upravom policije)

(1) Policijski komesar rukovodi Upravom policije.

(2) Policijski komesar odgovoran je za svoj rad ministru i Vladi Kantona.

(3) U rukovođenju Upravom policije, policijski komesar obavlja sljedeće poslove:

- a) predstavlja Upravu policije;
- b) nadgleda i usmjerava aktivnosti Uprave policije kojom rukovodi u skladu sa prioritetima koje odredi Vlada Kantona, uz konsultacije sa ministrom;

c) samostalno planira, upravlja, nadgleda i usmjerava cjelokupni operativni rad Uprave policije;

d) neposredno rukovodi policijom, organiziranjem, objedinjavanjem i usavršavanjem rada Uprave policije;

e) odlučuje u upravnim stvarima iz nadležnosti Uprave policije;

f) donosi podzakonske propise na koje je ovlašten zakonom i vrši izmjene ili dopune istih, te dostavlja ministru nacrt i prijedloge propisa ili izmjene i dopune propisa iz djelokruga rada Uprave policije;

g) odlučuje o zasnivanju radnog odnosa i prestanku radnog odnosa kao i o pravima, obavezama i odgovornostima iz radnog odnosa policijskih službenika, državnih službenika i namještenika uposlenih u Upravi policije u skladu sa zakonima i propisima kojima su uređena prava, obaveze i odgovornosti policijskih službenika, državnih službenika i namještenika iz radnog odnosa;

h) odlučuje o disciplinskoj odgovornosti policijskih službenika za lakšu povredu službene dužnosti;

i) priprema prijedloge potrebnih finansijskih i drugih sredstava za rad Uprave policije;

j) odlučuje o korištenju sredstava i vrši nabavku opreme i materijalno-tehničkih sredstava u skladu sa namjenom odobrenih sredstava na budžetskoj poziciji Uprave policije;

k) u skladu sa nadležnostima Uprave policije iz člana 23. ovog zakona donosi odluke o utrošku odobrenih finansijskih sredstava potrebnih za rad Uprave policije, odgovoran je za utvrđivanje obaveza u vezi sa platama i naknadama uposlenih, doprinosima poslodavca i ostalim doprinosima, troškovima za robe, usluge i nabavke sredstava za redovan rad u skladu s odobrenim budžetskim sredstvima za Upravu policije i računovodstvenim politikama korisnika budžeta i Trezora Kantona i odobrava isplatu finansijskih sredstava u okviru odobrenih sredstava dodjeljenih Upravi policije, te priprema izvještaje i preporuke u vezi sa budžetom, operacijama i zaposlenim;

- l) priprema tromjesečne izvještaje i preporuke u vezi sa realizacijom budžeta, koje podnosi ministru;
- m) predlaže ukupan broj uposlenika u Upravi policije;
- n) obrazuje stručne komisije i odgovarajuća radna tijela;
- o) utvrđuje potrebe, određuje i implementira programe stručnog osposobljavanja i usavršavanja uposlenika Uprave policije;
- p) organizuje jedinstven sistem izvještavanja i obrade podataka neophodnih za vršenje nadležnosti Uprave policije;
- r) raspisuje kantonalne potrage i oglašava raspisane potrage;
- s) osigurava saradnju sa drugim policijskim organima i agencijama za sprovođenje zakona u Bosni i Hercegovini, te saraduje sa tužilaštvima, sudovima i drugim nadležnim pravosudnim organima u pitanjima iz nadležnosti Uprave policije;
- t) priprema programe, informacije, analize i druge materijale iz djelokruga rada Uprave policije na zahtjev ministra, Vlade Kantona ili na vlastitu inicijativu;
- u) redovno izvještava ministra o poduzetim aktivnostima Uprave policije, a odmah po događajima i rezultatima poduzetih aktivnosti koje imaju značaj za sigurnost građana i interese Kantona, što će ministar bliže urediti posebnim općim aktom u saradnji sa policijskim komesarom;
- v) najmanje jednom mjesečno izvještava Nezavisni odbor o rezultatima rada Uprave policije i stavlja na raspolaganje sve tražene podatke i dokumentaciju iz nadležnosti rada Nezavisnog odbora;
- z) obavještava javnost o radu Uprave policije;
- aa) podnosi informacije i statističke podatke Federalnom ministarstvu unutrašnjih poslova, u vezi sa poslovima iz zajedničke nadležnosti Kantona i Federacije Bosne i Hercegovine, kao i poslova iz nadležnosti Federacije Bosne i Hercegovine koji su povjereni Ministarstvu;
- bb) odlučuje o načinu osiguranja određenih ličnosti i objekata;

cc) vrši druga ovlaštenja koja su mu ovim zakonom i drugim propisima data u nadležnost.

(4) Policijski komesar može ovlastiti načelnika Sektora uniformisane policije i načelnika Sektora kriminalističke policije ili rukovodioce organizacionih jedinica da vrše određene poslove iz stava (3) ovog člana.

## Član 27.

### (Zamjena policijskog komesara)

(1) Ukoliko policijski komesar zbog prestanka mandata, razrješenja, ostavke, bolesti, odsustva ili drugih stvarnih ili pravnih razloga, ne može vršiti svoja ovlaštenja u rukovođenju Upravom policije, te poslove vrši načelnik Sektora uniformisane policije, sve dok policijski komesar ne bude u stanju da ponovo preuzme svoju dužnost ili dok se ne imenuje novi policijski komesar. Načelnik Sektora uniformisane policije preuzima dužnosti dan nakon nastupanja navedenih okolnosti.

(2) Za vrijeme dok mijenja policijskog komesara u njegovom odsustvu, načelnik Sektora uniformisane policije ima sva prava, obaveze i ovlaštenja policijskog komesara propisana u članu 26. ovog zakona, kao i pravo na naknadu razlike plaće do nivoa osnovne plaće policijskog komesara ako vrši te poslove duže od 30 dana uzastopno.

(3) Ukoliko je i načelnik Sektora uniformisane policije zbog pravnih ili drugih stvarnih razloga spriječen da vrši poslove iz stava (2) ovog člana, načelnik Sektora kriminalističke policije zamjenjuje policijskog komesara, sve dok on ne bude u stanju da ponovo preuzme svoju dužnost ili dok se ne imenuje novi policijski komesar i ostvaruje prava iz stava (2) ovog člana.

(4) Ukoliko policijskom komesaru prestane mandat zbog smjene, prihvatanja ostavke, isteka mandata ili nemogućnosti da ponovo preuzme poslove, Vlada Kantona imenuje novog policijskog komesara, u skladu sa zakonom.

## **POGLAVLJE V – NEZAVISNI ODBOR I PROCES IZBORA, IMENOVANJE, MANDAT, NADZOR I RAZRJEŠENJE POLICIJSKOG KOMESARA**

### **Odjeljak A. Nezavisni odbor**

#### **Član 28.**

##### **(Nezavisni odbor)**

(1) Radi osiguranja nepristrasne, objektivne, kvalitetne i zakonite procedure imenovanja policijskog komesara, lišene svakog političkog utjecaja, formira se Nezavisni odbor koji omogućava da za policijskog komesara budu predloženi najkvalitetniji kandidati, kao i osiguranje stručnog, objektivnog i nepristrasnog praćenja rada policijskog komesara i obavljanje drugih poslova utvrđenih ovim zakonom.

(2) Na prijedlog Komisije za izbor i imenovanja Skupštine Kantona (u daljem tekstu: Komisija za izbor), Skupština Kantona imenuje Nezavisni odbor.

(3) Nezavisni odbor je nezavisno tijelo Skupštine Kantona koje provodi postupak izbora i razrješenja policijskog komesara, te vrši nadzor nad njegovim radom.

(4) Nezavisni odbor radi isključivo na profesionalnim osnovama, ne zastupajući, ne štiteći niti podrivajući interese bilo koje političke stranke, registrovane organizacije ili udruženja, ili bilo kojeg naroda u Bosni i Hercegovini.

#### **Član 29.**

##### **(Sastav Nezavisnog odbora)**

(1) Nezavisni odbor se sastoji od sedam članova.

(2) Članovi Nezavisnog odbora biraju se iz reda istaknutih stručnjaka iz oblasti pravnih, kriminalističkih, sigurnosnih ili drugih društvenih nauka, te iz organizacija koje se bave zaštitom ljudskih prava ili drugih srodnih oblasti, a koji nisu zaposleni u organima unutrašnjih poslova u Bosni i Hercegovini.

(3) Najmanje jedan član Nezavisnog odbora mora biti diplomirani pravnik, odnosno Bakalaureat/Bachelor prava sa ostvarenih 240 ECTS studijskih bodova.

(4) Sastav Nezavisnog odbora odražava nacionalni sastav stanovništva na teritoriji koju obuhvata Kanton prema posljednjem popisu stanovništva u Bosni i Hercegovini.

(5) U toku izbornog postupka, vodiće se računa o polnoj zastupljenosti.

#### **Član 30.**

##### **(Kriteriji za članstvo u Nezavisnom odboru)**

(1) Član Nezavisnog odbora može biti svako lice koje:

- a) je državljanin Bosne i Hercegovine;
- b) ima najmanje VII stepen školske spreme ili 240 ECTS studijskih bodova i najmanje pet godina radnog iskustva, nakon sticanja visoke školske spreme u oblasti pravnih, kriminalističkih, sigurnosnih ili drugih društvenih nauka;
- c) nije član političke stranke;
- d) u posljednje četiri godine nije bilo na bilo kojoj poziciji u političkoj stranci na bilo kojem nivou, niti je bio postavljen na bilo koju poziciju od strane političke stranke;
- e) u posljednje četiri godine nije bilo član izvršnog ili zakonodavnog tijela na bilo kojem nivou vlasti u Bosni i Hercegovini;
- f) nije osuđivano za krivično djelo;
- g) da se protiv njega ne vodi krivični postupak;
- h) da mu nije izrečena disciplinska sankcija za teže povrede službene dužnosti;
- i) da nije policijski službenik ili zaposlenik Ministarstva i Uprave policije.

#### **Član 31.**

##### **(Sukob interesa)**

(1) Član Nezavisnog odbora ne smije imati sukob interesa s radom policijskog organa i Ministarstva.

(2) Sukob interesa postoji kada lice predloženo za imenovanje ima lični interes u policijskim poslovima, koji mogu utjecati na zakonitost, transparentnost, objektivnost i nepristrasnost u vršenju funkcije u Nezavisnom odboru.

**Član 32.****(Imenovanje Nezavisnog odbora i trajanje mandata)**

(1) Nezavisni odbor se imenuje na mandatni period od četiri godine.

(2) Članovi Nezavisnog odbora iz stava (1) ovog člana mogu biti ponovno izabrani u Nezavisni odbor samo jednom uzastopno.

(3) Postupak izbora novog saziva Nezavisnog odbora pokreće se najkasnije šest mjeseci prije isteka mandata imenovanog Nezavisnog odbora.

(4) Ukoliko mandat Nezavisnog odbora istekne prije imenovanja novog Nezavisnog odbora, postojeći Nezavisni odbor nastavlja u kontinuitetu vršiti svoje dužnosti sve do imenovanja novog Nezavisnog odbora.

(5) Odredbe Zakona o ministarskim, vladinim i drugim imenovanjima Federacije Bosne i Hercegovine se primjenjuju na izbor članova Nezavisnog odbora, ukoliko nije drugačije određeno ovim zakonom.

**Član 33.****(Finansiranje Nezavisnog odbora)**

(1) Rad Nezavisnog odbora finansira se iz Budžeta Skupštine Kantona.

(2) Član Nezavisnog odbora ima pravo na mjesečnu naknadu za svoj rad čiju visinu utvrđuje Skupština Kantona.

**Član 34.****(Razrješenje člana Nezavisnog odbora)**

(1) Skupština Kantona će razriješiti člana Nezavisnog odbora ako:

- a) prestane ispunjavati bilo koji od uslova na osnovu kojih je imenovan za člana Nezavisnog odbora;
- b) ne obavlja poslove u skladu sa zakonom i usvojenim Poslovníkom o radu Nezavisnog odbora;
- c) neopravdano ne prisustvuje uzastopno na tri sjednice Nezavisnog odbora;
- d) po ocjeni nadležne zdravstvene institucije postane trajno nesposoban za obavljanje svojih dužnosti;
- e) ako postoji sukob interesa propisan članom 31. ovog zakona.

(2) Član Nezavisnog odbora je dužan obavijestiti Komisiju za izbor i imenovanja o bilo

kakvim promijenjenim okolnostima koje mogu utjecati na njegovo članstvo.

(3) Svako drugo zainteresirano lice može obavijestiti Komisiju za izbor i imenovanja o postojanju razloga iz st. (1) i (2) ovog člana.

(4) Komisija za izbor i imenovanja je dužna provjeriti navode u roku od 15 dana od dana saznanja za postojanje razloga iz st. (1) i (2) ovog člana.

(5) Ukoliko utvrdi postojanje razloga za razrješenje člana Nezavisnog odbora, Komisija za izbor i imenovanja odmah pokreće postupak razrješenja, te izbora novog člana, a Skupština Kantona ga imenuje.

(6) Razrješenje jednog ili više članova Nezavisnog odbora ne smije utjecati na rad Nezavisnog odbora koji nastavlja sa svojim radom, uključujući i donošenje odluka, dok Skupština Kantona ne izvrši imenovanje novog člana ili članova.

**Član 35.****(Ostavka člana Nezavisnog odbora)**

(1) Član Nezavisnog odbora može podnijeti ostavku.

(2) Ostavka se podnosi Skupštini Kantona.

(3) Ostavka jednog ili više članova Nezavisnog odbora ne smije utjecati na rad Nezavisnog odbora.

(4) Član Nezavisnog odbora u ostavci nastavlja da obavlja svoje dužnosti, uključujući i donošenje odluka, sve dok Skupština Kantona ne izvrši imenovanje novog člana ili članova.

(5) Komisija za izbor i imenovanja je dužna odmah započeti postupak izbora novog člana.

**Član 36.****(Nadležnosti Nezavisnog odbora)**

Nezavisni odbor obavlja sljedeće poslove iz svoje nadležnosti:

- a) raspisuje i provodi Javni konkurs za imenovanje policijskog komesara;
- b) vrši selekciju i predlaže listu kandidata za izbor policijskog komesara Vladi Kantona koju dostavlja posredstvom ministra;
- c) prati rad policijskog komesara i o tome izvještava Skupštinu Kantona;
- d) predlaže razrješenje policijskog komesara Vladi Kantona u skladu sa ovim zakonom;



- e) vodi prvostepeni disciplinski postupak protiv policijskog komesara i izriče disciplinske sankcije;
- f) prima, razmatra i postupa po podnesenim žalbama na rad policijskog komesara;
- g) usvaja poslovnik o radu Nezavisnog odbora i izvještava Skupštinu Kantona o svom radu;
- h) obavlja i druge poslove koji su stavljeni u njegovu nadležnost ovim zakonom.

### **Član 37.**

#### **(Funkcioniranje i odlučivanje Nezavisnog odbora)**

(1) Nezavisni odbor je dužan najkasnije u roku od 15 dana od dana imenovanja, u punom sazivu, održati konstituirajuću sjednicu i usvojiti Poslovnik o radu na koji saglasnost daje Skupština Kantona.

(2) Na prvoj konstituirajućoj sjednici članovi između sebe biraju predsjedavajućeg Nezavisnog odbora.

(3) Administrativne poslove za Nezavisni odbor obavlja administrativna i stručna služba Skupštine Kantona.

(4) Nezavisni odbor sačinjava izvještaj o svom radu svakih šest mjeseci i dostavlja ga Skupštini Kantona na razmatranje.

(5) Na zahtjev Skupštine Kantona Nezavisni odbor sačinjava dodatne izvještaje o svom radu.

(6) Nezavisni odbor donosi odluke ukoliko ima kvorum.

(7) Nezavisni odbor ima kvorum ukoliko je pet od sedam članova prisutno.

(8) Na redovnim sjednicama Nezavisni odbor donosi odluke, za koje su glasale najmanje četiri člana.

(9) Odluka o izboru, prijedlogu o smjeni, godišnjoj ocjeni rada policijskog komesara i disciplinskoj odgovornosti policijskog komesara je donesena, ako je za nju glasalo najmanje pet članova.

(10) Odluke se donose javno, a zapisnik o glasanju članova Nezavisnog odbora koji sadrži izjašnjenje svakog člana je dostupan javnosti.

## **Odjeljak B. Postupak izbora i imenovanja policijskog komesara**

### **Član 38.**

#### **(Uvjeti za radno mjesto policijskog komesara)**

Za radno mjesto policijskog komesara kandidat mora ispunjavati sljedeće uvjete:

- a) da je državljanin Bosne i Hercegovine;
- b) da je zdravstveno sposoban za vršenje poslova;
- c) da ima VII stepen stručne spreme ili 240 ECTS studijskih bodova;
- d) da ima najmanje tri godine radnog iskustva u činu glavnog inspektora ili višem činu;
- e) da mu nije pravomoćnom presudom izrečena krivično pravna sankcija;
- f) da protiv njega nije pokrenut krivični postupak i potvrđena optužnica u skladu sa zakonima o krivičnom postupku u Bosni i Hercegovini;
- g) da se na njega ne odnosi odredba člana IX1. Ustava Bosne i Hercegovine;
- h) da ne ispunjava uslove za penzionisanje, predviđene zakonom u toku mandata;
- i) da nije bio član političke stranke, niti je bio na bilo kojoj poziciji u političkoj stranci na bilo kojem nivou, niti je bio postavljen na bilo koju poziciju u organima vlasti od političke stranke u posljednjih pet godina;
- j) da nije, niti je bio član izvršnog ili zakonodavnog tijela na bilo kojem nivou vlasti u Bosni i Hercegovini u posljednjih pet godina;
- k) da nije disciplinski kažnjavan za teže povrede službene dužnosti.

### **Član 39.**

#### **(Postupak izbora kandidata)**

(1) Izbor policijskog komesara vrši se javnim konkursom.

(2) Postupak odabira novog policijskog komesara mora započeti najkasnije tri mjeseca prije isteka mandata imenovanog policijskog komesara.

(3) Nezavisni odbor donosi odluku o pokretanju postupka odabira i raspisivanja konkursa.

(4) Princip transparentnosti i zakonitosti se primjenjuju tokom postupka izbora i imenovanja.



**Član 40.****(Objavljivanje konkursa za radno mjesto policijskog komesara)**

(1) Konkurs za radno mjesto policijskog komesara objavljuje se u "Službenim novinama Federacije BiH" i u najmanje dva dnevna lista koja se distribuiraju na cijelom teritoriju Bosne i Hercegovine.

(2) Rok za podnošenje prijava je petnaest dana od dana zadnjeg objavljivanja.

(3) Konkurs sadrži:

- a) opis poslova radnog mjesta policijskog komesara;
- b) uvjete iz člana 38. ovog zakona;
- c) spisak potrebnih dokumenata;
- d) rok za podnošenje prijava i mjesto podnošenja;
- e) druge činjenice relevantne za provođenje konkursne procedure.

**Član 41.****(Postupak izbora)**

Nakon zaprimanja prijava Nezavisni odbor:

- a) pregleda prijave;
- b) uzima u obzir sve prijave primljene u propisanom roku;
- c) sačinjava spisak kandidata koji ispunjavaju uslove konkursa;
- d) obavlja razgovor sa kandidatima sa spiska.

**Član 42.****(Kriteriji odabira)**

(1) Kandidati koji ispunjavaju uvjete konkursa dostavljaju prijedlog plana i programa rada za vrijeme trajanja svog mandata.

(2) Pored razgovora, u procesu odabira Nezavisni odbor uzima u obzir slijedeće kvalifikacije:

- a) stručno usavršavanje;
- b) godine policijskog iskustva na rukovodećim radnim mjestima;
- c) ocjenu rada u posljednje tri godine i
- d) ostale kvalifikacije koje odgovaraju potrebama radnog mjesta.

(3) Pored dokumentacije iz člana 38. ovog zakona, kandidat koji se poziva na razgovor dostavlja i dokumentaciju kojom dokazuje kvalifikacije iz stava (2) ovog člana.

(4) Nezavisni odbor rangira kandidate na osnovu rezultata razgovora, ocjene kvalifikacija i predloženog plana rada iz st. (1) i (2) ovog člana.

**Član 43.****(Prijedlog ministru)**

Poslije obavljenog razgovora, a najkasnije u roku od 15 dana od dana isteka roka za podnošenje prijava, Nezavisni odbor upućuje Vladi Kantona, posredstvom ministra, obrazložen prijedlog sa najmanje dva kandidata zajedno sa dokumentacijom priloženom uz prijavu.

**Član 44.****(Prijedlog Vladi Kantona)**

(1) Najkasnije u roku od osam dana od prijema rezultata odabira od Nezavisnog odbora iz člana 43. ovog zakona, ministar upućuje obrazložen prijedlog Nezavisnog odbora sa imenima dva predložena kandidata Vladi Kantona, na imenovanje.

(2) Ukoliko ministar ne uputi prijedlog kandidata u roku iz stava (1) ovog člana, Nezavisni odbor dostavlja prijedlog sa imenima dva kandidata direktno Vladi Kantona, koja će imenovati jednog od kandidata za policijskog komesara.

**Član 45.****(Ponavljanje procesa izbora i prijedlog jednog kandidata)**

(1) Ukoliko Nezavisni odbor na osnovu objavljenog konkursa ne može sačiniti listu od najmanje dva kandidata koji ispunjavaju uslove konkursa, konkurs će se ponoviti u roku od 15 dana od dana okončanja objavljenog konkursa.

(2) Ukoliko po ponovljenom konkursu Nezavisni odbor ne može sačiniti listu od najmanje dva kandidata, biće predložen kandidat koji ispunjava uvjete iz konkursa, te će putem ministra prijedlog biti dostavljen Vladi Kantona na odlučivanje.

(3) Ministar će prijedlog iz stava (2) ovog člana prosljediti Vladi Kantona u roku od osam dana od dana prijema prijedloga.

(4) Ukoliko ministar ne uputi prijedlog kandidata u roku iz stava (3) ovog člana, Nezavisni odbor dostavlja prijedlog sa imenom kandidata iz stava (2) ovog člana direktno Vladi Kantona osam dana nakon isteka roka iz stava (3) ovog člana.

**Član 46.****(Imenovanje policijskog komesara)**

(1) U roku od 30 dana, od dana prijema prijedloga, u skladu sa članom 44. odnosno članom 45. ovog zakona, Vlada Kantona donosi odluku o imenovanju predloženog kandidata na radno mjesto policijskog komesara, koja se objavljuje u "Službenom glasniku Unsko-sanskog kantona".

(2) Policijski komesar daje pismenu izjavu o imovinskom stanju, koja će biti dostupna javnosti.

**Član 47.****(Mandat policijskog komesara)**

(1) Mandat policijskog komesara je četiri godine i može se obnoviti samo jednom uzastopno.

(2) O pojedinačnim pravima i dužnostima policijskog komesara koja se odnose na radno pravni status, odlučuje se rješenjem koje donosi ministar.

**Odjeljak C. Praćenje rada policijskog komesara****Član 48.****(Praćenje rada policijskog komesara)**

(1) Nezavisni odbor se sastaje najmanje jednom mjesečno.

(2) Policijski komesar dužan je redovno izvještavati Nezavisni odbor o svom radu i staviti mu na raspolaganje sve tražene podatke i dokumentaciju iz nadležnosti rada Nezavisnog odbora.

(3) Nezavisni odbor sačinjava detaljan tromjesečni izvještaj o radu policijskog komesara i dostavlja ga Skupštini Kantona.

**Član 49.****(Godišnja ocjena rada policijskog komesara)**

(1) Nezavisni odbor, donosi prijedlog godišnje pismene ocjene rada policijskog komesara prema ocjenama: "nezadovoljava" ili "zadovoljava". Prijedlog ocjene se uz obrazloženje dostavlja ministru, Vladi Kantona i policijskom komesaru za informaciju.

(2) Ministar i policijski komesar imaju pravo dati svoje pisano izjašnjenje o prijedlogu ocjene iz stava (1) ovog člana koje ministar dostavlja Vladi Kantona na odlučivanje.

(3) Na osnovu prijedloga ocjena Nezavisnog odbora i izjašnjenja ministra i policijskog komesara, Vlada Kantona donosi Odluku o godišnjoj ocjeni rada policijskog komesara.

(4) Policijski komesar može izjaviti prigovor Vladi Kantona, na odluku iz stava (3) ovog člana, u roku od osam dana od dana dostavljanja odluke.

(5) Odluka Vlade Kantona po prigovoru je konačna.

**Član 50.****(Pristup Nezavisnog odbora informacijama)**

(1) U svrhu ocjene rada policijskog komesara, Nezavisni odbor uzima u obzir dokumente relevantne za rad policijskog komesara i poziva policijskog komesara da prisustvuje sjednici Nezavisnog odbora jednom u tri mjeseca. Nezavisni odbor zahtijeva od Ministarstva i njegovih organizacionih jedinica pristup svim informacijama za koje smatra da su neophodne za ocjenu rada policijskog komesara.

(2) Nezavisni odbor ima pravo pristupa informacijama u skladu sa odredbama Zakona o zaštiti ličnih podataka i Zakona o zaštiti tajnih podataka.

**Odjeljak D. Postupak razrješenja policijskog komesara****Član 51.****(Uvjeti za razrješenje policijskog komesara)**

Nezavisni odbor podnosi prijedlog za razrješenje policijskog komesara Vladi Kantona u sljedećim slučajevima:

- a) na lični zahtjev policijskog komesara;
- b) ukoliko trajno nije u mogućnosti obavljati svoje dužnosti i odgovornosti;
- c) ukoliko ne provodi mjere nadzora nad Upravom policije ili mjere nadzora nad primjenom policijskih ovlaštenja;
- d) ukoliko je konačnom odlukom utvrđena disciplinska odgovornost policijskog komesara i sankcija prestanak radnog odnosa;
- e) ukoliko je njegov rad ocijenjen godišnjom ocjenom "nezadovoljava";
- f) ukoliko je protiv njega pokrenut krivični postupak i potvrđena optužnica u skladu sa zakonima o krivičnom postupku u Bosni i Hercegovini;
- g) ukoliko je izrečena pravomoćna kazna zatvora za krivično djelo ili
- h) ukoliko su ispunjeni uvjeti za prestanak radnog odnosa propisani Zakonom o policijskim službenicima Unsko-sanskog kantona.

**Član 52.**  
**(Pokretanje i odluka o razrješenju  
policijskog komesara)**

(1) Ukoliko postoji jedan ili više razloga ili uvjeta za pokretanje postupka smjene iz člana 51. ovog zakona, Nezavisni odbor će posredstvom ministra dostaviti prijedlog za razrješenje policijskog komesara Vladi Kantona.

(2) Vlada Kantona je dužna u roku od 30 dana od dana prijema prijedloga Nezavisnog odbora, razmotriti dostavljeni prijedlog i donijeti odluku o razrješenju ili o odbijanju prijedloga iz stava (1) ovog člana.

**Član 53.**  
**(Inicijativa ministra za razrješenje  
policijskog komesara)**

(1) Ministar može podnijeti inicijativu za razrješenje policijskog komesara.

(2) Inicijativa iz stava (1) ovog člana podnosi se u slučaju kada se raspolože dokazima da policijski komesar ne obavlja pravilno poslove iz člana 26. stav (3) tačka b) i t) ovog zakona.

(3) Inicijativu iz stava (1) ovog člana ministar dostavlja Nezavisnom odboru na razmatranje i davanje mišljenja.

(4) Nezavisni odbor dužan je svoje mišljenje dati u roku od 15 dana od dana prijema inicijative.

(5) Ministar će svoju inicijativu za razrješenje policijskog komesara i mišljenje Nezavisnog odbora dostaviti Vladi Kantona na razmatranje i odlučivanje, koja je dužna u roku od 30 dana od dana prijema inicijative i mišljenja iz stava (3) ovog člana, razmotriti i donijeti konačnu odluku.

**POGLAVLJE VI – DISCIPLINSKA  
ODGOVORNOST POLICIJSKOG  
KOMESARA**

**Član 54.**  
**(Disciplinska odgovornost policijskog  
komesara)**

(1) Policijski komesar je disciplinski odgovoran za povrede službene dužnosti utvrđene u članu 55. ovog zakona koje nastaju kao rezultat njegove krivice.

(2) Krivična odgovornost za krivično djelo i prekršajna odgovornost za prekršaj ne isključuje disciplinsku odgovornost policijskog komesara ako počinjeno krivično djelo ili prekršaj

istovremeno predstavlja i povredu službene dužnosti iz člana 55. ovog zakona.

(3) Oslobođanje od krivične odgovornosti ili prekršajne odgovornosti ne podrazumijeva istovremeno i oslobođanje od disciplinske odgovornosti policijskog komesara.

**Član 55.**  
**(Povrede službenih dužnosti policijskog  
komesara)**

(1) Policijski komesar disciplinski odgovara za sljedeće povrede službenih dužnosti:

- a) neizvršavanje ili nesavjesno ili nepravovremeno izvršavanje službenih zadataka predviđenih ovim i drugim zakonima i podzakonskim propisima;
- b) zloupotreba službenog položaja;
- c) nekorektno i neprofesionalno ponašanje prema policijskim službenicima, državnim službenicima ili namještenicima Uprave policije ili strankama;
- d) davanje netačnih podataka koji utječu na donošenje odluka nadležnih organa;
- e) odbijanje izvršenja zakonitih naredbi nadležnih organa;
- f) spriječavanje građana ili pravnih lica u ostvarivanju njihovih prava pri podnošenju zahtjeva, žalbi, pritužbi, molbi i drugih podnesaka ili neodlučivanje po tim podnescima u zakonskom roku;
- g) prikrivanje činjenica o načinu izvršenja službenih zadataka;
- h) spriječavanje, izbjegavanje, ometanje ili na drugi način odgađanje provođenja disciplinskog postupka protiv državnog službenika, policijskog službenika i namještenika;
- i) nepoduzimanje ili nedovoljno poduzimanje mjera iz svoje nadležnosti;
- j) davanje i otkrivanje podataka koji su određeni stepenom tajnosti u skladu sa Zakonom o zaštiti tajnih podataka;
- k) provođenje aktivnosti koje nisu u skladu sa interesima Uprave policije i Ministarstva, odnosno kojima se narušava ugled Ministarstva i Uprave policije;
- l) učestvovanje u političkim aktivnostima i obavljanje drugih političkih aktivnosti koje nisu u skladu sa službenom dužnošću;
- m) protivpravno pribavljanje lične ili imovinske koristi za sebe ili druge u vezi sa radom;

- n) izdavanje naređenja čije bi izvršenje predstavljalo krivično djelo;
- o) diskriminacija pri vršenju dužnosti na osnovu: rase, boje kože, spola, jezika, religije, političkog ili drugog opredjeljenja, nacionalnog ili socijalnog porijekla ili po bilo kojem drugom osnovu.

#### **Član 56.**

##### **(Rješenje o pokretanju disciplinskog postupka)**

(1) Rješenje o pokretanju disciplinskog postupka donosi ministar u slučaju postojanja osnova sumnje da je policijski komesar počinio povredu službene dužnosti iz člana 55. ovog zakona, u kojem se određuje lice koje će zastupati rješenje o pokretanju disciplinskog postupka pred Nezavisnim odborom.

(2) Inicijativu za pokretanje disciplinskog postupka mogu podnijeti Nezavisni odbor, radna tijela Skupštine Kantona nadležna za sigurnost i ministar.

(3) Izuzetno od stava (1) ovog člana, rješenje o pokretanju disciplinskog postupka, u slučaju kada inicijativu iz stava (2) ovog člana podnosi ministar, donosi komisija koja ima tri člana, a koju imenuje radno tijelo Skupštine Kantona nadležno za sigurnost iz reda poslanika Skupštine Kantona, s tim da najmanje jedan član mora imati najmanje VII stepen školske spreme ili visoko obrazovanje po bolonjskom sistemu studiranja sa ostvarenih najmanje 240 ECTS studijskih bodova pravne struke.

#### **Član 57.**

##### **(Vođenje disciplinskog postupka protiv policijskog komesara)**

(1) Nezavisni odbor vodi prvostepeni disciplinski postupak protiv policijskog komesara i donosi rješenje o izricanju disciplinske sankcije.

(2) Izuzetno od stava (1) ovog člana, u slučaju kada Nezavisni odbor podnosi inicijativu iz člana 56. stav (2) ovog zakona, radno tijelo Skupštine Kantona imenuje posebnu komisiju iz reda poslanika Skupštine Kantona, koja broji pet članova, s tim da najmanje jedan član mora imati najmanje VII stepen školske spreme ili visoko obrazovanje po bolonjskom sistemu studiranja sa ostvarenih najmanje 240 ECTS studijskih bodova pravne struke.

(3) Postupak iz stava (1) ovog člana vodi se prema odredbama propisa iz člana 60. ovog zakona.

(4) Protiv prvostepenog rješenja iz st. (1) i (2) ovog člana može se izjaviti žalba drugostepenoj disciplinskoj komisiji iz člana 58. ovog zakona, u roku od 15 dana od dana prijema rješenja.

(5) Disciplinski postupak je javan.

#### **Član 58.**

##### **(Drugostepeni disciplinski postupak)**

(1) Drugostepeni disciplinski postupak vodi drugostepena disciplinska komisija koju ad hoc imenuje radno tijelo Skupštine Kantona nadležno za sigurnost.

(2) Drugostepena disciplinska komisija ima pet članova od kojih najmanje dva člana moraju imati VII stepen školske spreme ili visoko obrazovanje po bolonjskom sistemu studiranja sa ostvarenih najmanje 240 ECTS studijskih bodova pravne struke.

(3) U drugostepenu disciplinsku komisiju ne mogu biti imenovani članovi Nezavisnog odbora.

(4) Postupak iz stava (1) ovog člana vodi se prema odredbama propisa iz člana 60. ovog zakona.

(5) Rješenje Drugostepene disciplinske komisije doneseno po žalbi je konačno i protiv njega se može podnijeti tužba kod nadležnog suda u roku od 30 dana od dana prijema rješenja.

#### **Član 59.**

##### **(Disciplinske sankcije)**

(1) Za povrede službene dužnosti iz člana 55. ovog zakona mogu se izreći sljedeće disciplinske sankcije:

- a) pismena opomena;
- b) novčana kazna u iznosu od 15% do 40% osnovne plaće na period do šest mjeseci;
- c) prestanak radnog odnosa.

(2) Pismena opomena se izriče za povrede iz člana 55. tačka h) ovog zakona.

(3) Disciplinska sankcija prestanak radnog odnosa izriče se u slučaju kada se ocijeni da su izvršene povrede službene dužnosti izazvale teže posljedice za sigurnost u Kantonu ili Federaciji i da je prestanak radnog odnosa jedina odgovarajuća disciplinska sankcija za nastale posljedice.



**Član 60.****(Ovlaštenje za donošenje propisa)**

Disciplinski postupak i izricanje disciplinskih sankcija iz člana 59. ovog zakona, te druga pitanja koja se odnose na disciplinsku odgovornost policijskog komesara uredbom propisuje Vlada Kantona uz saglasnost radnog tijela Skupštine Kantona nadležnog za sigurnost.

**Član 61.****(Obaveza saradnje)**

Sve organizacione jedinice Uprave policije i Ministarstva saraduju sa organima disciplinskog postupka, uključujući pristup relevantnim podacima i osoblju.

**POGLAVLJE VII – SKUPŠTINSKI  
NADZOR NAD ZAKONITOŠĆU RADA  
MINISTARSTVA I UPRAVE POLICIJE****Član 62.****(Način vršenja skupštinskog nadzora nad zakonitošću rada Ministarstva i Uprave policije)**

Nadzor nad zakonitošću rada Ministarstva i Uprave policije osigurava Skupština Kantona putem skupštinske i građanske kontrole predviđene u čl. od 63. do 73. ovog zakona.

**Odjeljak A. Ovlaštenje radnog tijela Skupštine  
Kantona nadležnog za sigurnost u vršenju  
nadzora****Član 63.****(Način i postupak vršenja skupštinskog  
nadzora)**

(1) Skupštinski nadzor nad zakonitošću rada Ministarstva i Uprave policije vrši radno tijelo Skupštine Kantona nadležno za sigurnost.

(2) Nadzor iz stava (1) ovog člana vrši se razmatranjem izvještaja i informacija ministra i policijskog komesara, kao i obavljanjem razgovora sa ministrom i policijskim komesarom, a ako se ocijeni potrebnim, može se izvršiti i neposredni uvid u akte i predmete, odnosno dokumentaciju Ministarstva i Uprave policije.

(3) Ministarstvo i Uprava policije dužni su radi vršenja nadzora iz stava (1) ovog člana dati na uvid tražene podatke, spise i dokumentaciju, kao i potrebna objašnjenja u zahtijevanom roku.

**Član 64.****(Uvjeti za formiranje ad hoc tijela kod  
vršenja skupštinskog nadzora)**

(1) Radno tijelo iz člana 63. stav (1) ovog zakona, nakon preuzetih aktivnosti, može odlučiti da o određenim pitanjima bude provedena istraga i obavljeno saslušanje svjedoka, odnosno drugih osoba, kao i da budu izvedeni drugi dokazi potrebni za utvrđivanje bitnih činjenica.

(2) Istragu iz stava (1) ovog člana vrši ad hoc tijelo, koje se formira za svaki konkretni slučaj.

(3) Članovi tijela iz stava (2) ovog člana bit će imenovani sa liste eksperata iz pojedinih oblasti u skladu sa procedurom koju odredi radno tijelo Skupštine Kantona nadležno za sigurnost.

(4) Listu iz stava (3) ovog člana čine policijski službenici, državni službenici, predstavnici sudske vlasti i advokatske komore.

(5) Članovi tijela iz stava (2) ovog člana potpisat će izjavu o čuvanju tajnosti podataka koji im budu dostupni.

(6) Obrazac i tekst izjave sačinjit će radno tijelo Skupštine Kantona nadležno za sigurnost.

**Član 65.****(Dostavljanje izvještaja o izvršenom nadzoru  
Skupštini Kantona)**

(1) Radno tijelo iz člana 63. stav (1) ovog zakona izvještaj o izvršenom nadzoru ili istrazi iz čl. 63. i 64. ovog zakona dostavlja Skupštini Kantona, koja donosi smjernice i daje nalog za otklanjanje utvrđenih nepravilnosti, te određuje rokove za izvršenje tih zadataka.

(2) Ministarstvo i Uprava policije dužni su postupati prema smjernicama i nalogima Skupštine Kantona i o poduzetim mjerama informirati Skupštinu Kantona u roku od 30 dana od dana prijema tih smjernica ili naloga.

**Član 66.****(Ovlaštenje za donošenje propisa)**

Radno tijelo iz člana 63. stav (1) ovog zakona, uz saglasnost Zakonodavno-pravne komisije Skupštine Kantona, propisat će sadržaj i način vršenja nadzora iz čl. 63. i 64. ovog zakona.



**Odjeljak B. Odbor za žalbe javnosti****Član 67.****(Sastav Odbora za žalbe javnosti)**

(1) Odbor za žalbe javnosti (u daljem tekstu: Odbor) se osniva kao nezavisno tijelo Skupštine Kantona kojeg čine tri člana, od kojih je jedan član državni službenik kantonalnih organa uprave, a dva člana predstavnici građana od kojih je jedan predsjedavajući Odbora.

(2) Odbor imenuje Skupština Kantona, na prijedlog Komisije za izbor i imenovanja Skupštine Kantona.

(3) Sastav Odbora odražavat će nacionalnu i spolnu zastupljenost.

(4) Administrativnu i tehničku podršku u radu Odbora pruža Skupština Kantona koja osigurava i naknadu za rad članova Odbora.

**Član 68.****(Rad Odbora)**

(1) Rad Odbora ima za cilj osigurati objektivno i nepristrasno vođenje postupka u vezi sa izjavljenim žalbama na rad i ponašanje policijskih službenika, čime osigurava zaštitu ljudskih prava i sloboda.

(2) Pod žalbama iz stava (1) ovog člana podrazumijevaju se zahtjevi, žalbe, pritužbe ili drugi podnesci koji se odnose na nepravilan rad policijskih službenika.

**Član 69.****(Poslovi iz nadležnosti Odbora)**

(1) Odbor je nadležan za obavljanje sljedećih poslova:

- a) prima, razmatra, procjenjuje i prosljeđuje žalbe na rad policijskih službenika Uprave policije izjavljenih od građana, pravnih lica i drugih subjekata;
- b) prati i nadzire vođenje predmeta i internog postupka koje provodi Jedinica za profesionalne standarde i obavještava podnosioca žalbe o ishodu postupka;
- c) prati i nadgleda izvršenje disciplinskih sankcija izrečenih od nadležnih disciplinskih tijela i provođenje tih disciplinskih sankcija kako bi se osigurala pravičnost i dosljednost, kao i svrha kažnjavanja;
- d) na osnovu izvještaja Jedinice za profesionalne standarde vodi evidencije i baze podataka o žalbama izjavljenim na rad policijskih

službenika i rezultatima istrage na osnovu kojih je pokrenut disciplinski, prekršajni ili krivični postupak;

- e) prati i nadgleda da li je Jedinica za profesionalne standarde dostavila izvještaj nadležnom tužilaštvu u slučaju kada postoje osnovi sumnje da se radi o krivičnom djelu;
- f) predlaže pokretanje disciplinskog postupka protiv istražitelja ili drugog službenika Jedinice za profesionalne standarde, zaduženog za provođenje postupka, zbog zloupotrebe ili zapostavljanja postupka;
- g) vrši nadzor nad ostvarivanjem nezavisnosti u radu Jedinice za profesionalne standarde koja se odnosi na pokrenuti interni postupak;
- h) dostavlja Nezavisnom odboru žalbe koje se odnose na rad policijskog komesara;
- i) priprema i Skupštini Kantona podnosi godišnji izvještaj o svom radu;
- j) obavještava javnost o svom radu;
- k) donosi poslovnik o svom radu uz saglasnost radnog tijela Skupštine Kantona nadležnog za sigurnost i
- l) obavlja i druge poslove propisane zakonom i podzakonskim propisima.

(2) Ako se žalba ili pritužba odnosi na državnog službenika ili namještenika Ministarstva ili Uprave policije, Odbor prosljeđuje žalbu ili pritužbu ministru odnosno policijskom komesaru u roku od 15 dana od dana prijema žalbe, odnosno pritužbe.

**Član 70.****(Dostavljanje žalbe Jedinici za profesionalne standarde)**

(1) Odbor će žalbu ili pritužbu izjavljenu na rad policijskog službenika dostaviti Jedinici za profesionalne standarde u roku od 15 dana od dana prijema žalbe, koja će obavijestiti Odbor o svim poduzetim radnjama po dostavljenoj žalbi ili pritužbi nakon provedenog internog postupka.

(2) Odbor je dužan dati mišljenje o obavijesti iz stava (1) ovog člana u roku od 15 dana od dana prijema obavijesti.

**Član 71.****(Mandat članova Odbora)**

(1) Odbor se imenuje na mandatni period od četiri godine.

(2) Članovi Odbora iz stava (1) ovog člana mogu biti ponovo izabarani u Odbor samo jednom

uzastopno. Najmanje šest mjeseci prije isteka mandata pokrenut će se procedura za izbor novog Odbora.

#### **Član 72.**

##### **(Uvjeti za imenovanje i razrješenje članova Odbora)**

(1) Članovi Odbora biraju se iz reda istaknutih stručnjaka iz oblasti pravnih ili drugih društvenih nauka, sa najmanje pet godina radnog staža u struci nakon sticanja visoke školske spreme, a predsjedavajući Odbora treba imati najmanje deset godina radnog iskustva na pravnim poslovima državnog službenika ili kao sudija ili tužilac.

(2) Uvjeti za imenovanje i razrješenje članova Odbora, te postupak njihovog imenovanja i razrješenja bliže će se urediti pravilnikom koji donosi ministar uz saglasnost Komisije za izbor i imenovanja Skupštine Kantona.

### **POGLAVLJE VIII – ZAPOSLENICI MINISTARSTVA, STRUČNO OBRAZOVANJE I USAVRŠAVANJE I NAGRAĐIVANJE**

#### **Član 73.**

##### **(Zaposlenici Ministarstva i Uprave policije)**

(1) Poslove i zadatke iz nadležnosti Ministarstva i Uprave policije vrše državni službenici, policijski službenici i namještenici.

(2) Policijski službenici su zaposlenici Uprave policije ovlaštene da primjenjuju policijske ovlasti, propisane Zakonom o policijskim službenicima Unsko-sanskog kantona i postupaju kao ovlaštena službena lica po posebnim propisima. Radno pravni status policijskih službenika uređen je Zakonom o policijskim službenicima Unsko-sanskog kantona.

(3) Državni službenici i namještenici su zaposlenici Ministarstva i Uprave policije čiji je radno pravni status uređen propisom o državnoj službi.

(4) Radna mjesta državnih službenika, policijskih službenika i namještenika utvrđuju se pravilnikom o unutrašnjoj organizaciji.

#### **Član 74.**

##### **(Radna mjesta na kojima se obavljaju poslovi pod posebnim uvjetima i odgovornostima)**

(1) Za određena radna mjesta državnih službenika i namještenika u Ministarstvu i Upravi policije na kojima se obavljaju poslovi pod posebnim uvjetima i odgovornostima, sredstva za plaće stiču se pod istim uvjetima koji važe za državne službenike i namještenike kantonalnih organa uprave, uvećana do 30 % od osnovne plaće.

(2) Vlada Kantona, na prijedlog ministra i policijskog komesara, utvrđuje radna mjesta iz stava (1) ovog člana.

#### **Član 75.**

##### **(Stručno osposobljavanje i usavršavanje)**

Svi zaposlenici Ministarstva i Uprave policije su obavezni da se stručno osposobljavaju i usavršavaju. Sredstva za stručno osposobljavanje i usavršavanje iz stava (1) ovog člana bit će predviđena u budžetu Kantona, na budžetskoj poziciji Ministarstva i Uprave policije.

#### **Član 76.**

##### **(Odabir kandidata)**

(1) Uprava policije odabire kandidate za pohađanje obuke za policijske službenike u skladu sa potrebama Uprave policije i po postupku utvrđenom u skladu sa Zakonom o policijskim službenicima Unsko-sanskog kantona.

(2) Nakon konačnog odabira kandidata i zaključenja ugovora, kandidati stiču status kadeta.

(3) Obuka kadeta za potrebe Uprave policije se reguliše posebnim ugovorom između Uprave policije i institucije u kojoj se vrši osnovna policijska obuka.

#### **Član 77.**

##### **(Međusobne obaveze kadeta i Uprave policije)**

(1) Međusobne obaveze između kadeta i Uprave policije se regulišu posebnim ugovorom.

(2) Za vrijeme obuke kadeti će imati obezbijeđen smještaj, hranu, kompletnu uniformu, udžbenike, zdravstveno i invalidsko osiguranje ako nemaju takvo osiguranje po drugoj osnovi i mjesečna primanja dovoljna da pokriju osnovne lične troškove.

(3) Sredstva za školovanje kadeta u instituciji koja obezbjeđuje osnovnu policijsku obuku

osiguravaju se u budžetu Kantona, na budžetskoj poziciji Uprave policije.

#### **Član 78. (Nagrade)**

(1) Organizacionim jedinicama i zaposlenicima Ministarstva i Uprave policije mogu biti dodijeljena priznanja, pohvale i druge nagrade za postignuti uspjeh u vršenju njihovih poslova.

(2) Priznanja, pohvale i druge nagrade iz stava (1) ovog člana za organizacione jedinice i zaposlenike Ministarstva, dodjeljuju se na osnovu rješenja ministra, a za organizacione jedinice i zaposlenike Uprave policije na osnovu rješenja policijskoga komesara.

(3) Ministar donosi pravilnik o priznanjima, pohvalama i nagradama koje se dodjeljuju organizacionim jedinicama i zaposlenicima Ministarstva i Uprave policije.

### **POGLAVLJE IX – MEĐUSOBNI ODNOSI I SARADNJA MINISTARSTVA SA MINISTARSTVOM SIGURNOSTI, DRUGIH MINISTARSTAVA UNUTRAŠNJIH POSLOVA I POLICIJSKIM ORGANIMA I ORGANIMA UPRAVE U BOSNI I HERCEGOVINI**

#### **Član 79. (Princip saradnje)**

Međusobni odnosi Ministarstva sa organima uprave na svim nivoima vlasti u Bosni i Hercegovini zasnivaju se na uzajamnoj saradnji, kontaktima, sporazumima, protokolima, ugovorima, razmjeni informacija od zajedničkog interesa u skladu sa zakonom.

#### **Odjeljak A. Međusobni odnosi i saradnja unutar Federacije Bosne i Hercegovine**

#### **Član 80. (Saradnja sa drugim ministarstvima unutrašnjih poslova kantona i Federalnim ministarstvom unutrašnjih poslova)**

Ministarstvo saraduje sa Federalnim ministarstvom unutrašnjih poslova i ministarstvima unutrašnjih poslova drugih kantona u cilju zajedničkog unapređivanja rada, usaglašavanja planova rada, poduzimanja zajedničkih aktivnosti i sigurnosnih mjera od zajedničkog interesa.

#### **Član 81.**

#### **(Zadaci povjereni od strane Federalnog ministarstva unutrašnjih poslova i pružanje pomoći ministarstvima unutrašnjih poslova drugih kantona)**

(1) Federalno ministarstvo unutrašnjih poslova može povjeriti Ministarstvu poslove iz svoje nadležnosti u skladu sa Zakonom o unutrašnjim poslovima Federacije Bosne i Hercegovine.

(2) Ministarstvo izvršava povjerene zadatke od strane Federalnog ministarstva unutrašnjih poslova.

(3) Ministarstvo pruža pomoć ministarstvima unutrašnjih poslova drugih kantona kad oni to zatraže.

(4) U slučaju da Ministarstvo poduzme aktivnosti navedene u st. (1) i (2) ovog člana, Federalno ministarstvo unutrašnjih poslova ili ministarstvo unutrašnjih poslova drugog kantona snosi dodatne troškove izvršenja tih zadataka. Detalji u vezi sa dodatnim troškovima se dogovaraju na uzajamnoj osnovi i po potrebi, a što se reguliše posebnim ugovorom.

#### **Odjeljak B. Međusobni odnosi i saradnja sa Ministarstvom sigurnosti, ostalim ministarstvima unutrašnjih poslova, policijskim organima i organima uprave u Bosni i Hercegovini**

#### **Član 82.**

#### **(Saradnja sa drugim organima, ministarstvima unutrašnjih poslova i ostalim policijskim agencijama u Bosni i Hercegovini)**

Ministarstvo saraduje sa i Ministarstvom sigurnosti Bosne i Hercegovine, kao i sa Državnom agencijom za istrage i zaštitu, Graničnom policijom Bosne i Hercegovine, Direkcijom za koordinaciju policijskih tijela Bosne i Hercegovine, Agencijom za policijsku podršku, Obavještajno sigurnosnom agencijom Bosne i Hercegovine, Ministarstvom unutrašnjih poslova Republike Srpske, Policijom Distrikta Brčko Bosne i Hercegovine, putem kontakata, sporazuma, protokola i razmjene informacija o pitanjima od zajedničkog interesa.

**Član 83.****(Pružanje pomoći policijskim organima u Bosni i Hercegovini)**

(1) U okviru svoje nadležnosti, Ministarstvo je dužno saradivati s policijskim organima iz člana 82. ovog zakona, te istima pružati pomoć, na njihov zahtjev.

(2) U slučaju da Ministarstvo poduzme aktivnosti iz stava (1) ovog člana, ministarstva i ostali policijski organi snose dodatne troškove izvršenja tih zadataka. Detalji u vezi sa dodatnim troškovima se dogovaraju na uzajamnoj osnovi i po potrebi u skladu sa posebnim ugovorom.

**Član 84.****(Zajedničko korištenje sredstava Uprave policije i ostalih policijskih organa)**

(1) Uprava policije može zajednički koristiti sredstva policijskih organa i organa uprave u Bosni i Hercegovini, Federalne uprave policije, uprava policije drugih kantona, Ministarstva unutrašnjih poslova Republike Srpske, Policije Brčko Distrikta Bosne i Hercegovine za vršenje poslova u vezi sa stručnim osposobljavanjem i usavršavanjem policijskih službenika, naučno-istraživačkim radom relevantnim za potrebe policije, razvoja kompleksnih kriminalističkih i tehničkih stručnih procjena, obezbjeđenjem policijske opreme, sistema informacionih tehnologija i komunikacijskih sistema, naoružanja i drugih sličnih sredstava, kao i u vezi drugih zadataka iz svoje nadležnosti.

(2) U skladu sa stavom (1) ovog člana policijski organi mogu udruživati finansijska i druga sredstva. Detalji o zajedničkim finansijskim i drugim sredstvima se dogovaraju na uzajamnoj osnovi i po potrebi, što se reguliše posebnim ugovorom.

**Odjeljak C. Međusobni odnosi i saradnja u krivičnim stvarima Uprave policije sa drugim policijskim organima i agencijama za provođenje zakona u Bosni Hercegovini****Član 85.****(Saradnja u krivičnim stvarima)**

Uprava policije uspostavlja službenu saradnju u krivičnim stvarima sa drugim policijskim organima i agencijama za provođenje zakona u Bosni i Hercegovini, u skladu sa Zakonom o pravnoj pomoći i službenoj saradnji u krivičnim stvarima između Federacije Bosne i Hercegovine,

Republike Srpske i Brčko Distrikta Bosne i Hercegovine i drugim zakonima i propisima.

**Član 86.****(Razmjena informacija i prikupljanje podataka)**

U ostvarivanju saradnje iz člana 83. ovog zakona, uspostavlja se kontinuirana razmjena podataka i informacija između Uprave policije, Direkcije za koordinaciju policijskih tijela Bosne i Hercegovine, Državne agencije za istrage i zaštitu, Granične policije Bosne i Hercegovine, Federalne uprave policije, drugih kantonalnih uprava policije, Obavještajno sigurnosne agencije Bosne i Hercegovine, Ministarstva unutrašnjih poslova Republike Srpske i Policije Brčko Distrikta Bosni i Hercegovini kao i sa drugim nadležnim organima.

**Član 87.****(Ovlasti policijskih službenika na teritoriji Kantona)**

Policijski službenici Direkcije za koordinaciju policijskih tijela Bosne i Hercegovine, Državne agencije za istrage i zaštitu, Granične policije Bosne i Hercegovine i Federalne uprave policije, kod vršenja poslova iz svoje nadležnosti, imaju iste ovlasti na teritoriji Kantona, kao i policijski službenici Uprave policije.

**Član 88.****(Vršenje poslova izvan teritorije Kantona)**

Uprava policije može direktno sa drugim kantonalnim upravama policije ili sa Ministarstvom unutrašnjih poslova Republike Srpske i sa Policijom Brčko Distrikta Bosne i Hercegovine utvrditi uvjete pod kojima policijski službenici mogu vršiti određene zadatke ili poslove na području drugog policijskog organa, te uvjete pod kojim policijski službenici tih organa mogu vršiti određene poslove i zadatke na području Kantona.

**Član 89.****(Krivična djela u nadležnosti drugih policijskih organa)**

(1) U slučaju da vršeći zadatke iz svoje nadležnosti, otkrije da se priprema izvršenje ili je izvršeno krivično djelo u nadležnosti drugih policijskih organa u Bosni i Hercegovini, Uprava policije poduzima neophodne mjere i aktivnosti na sprečavanju izvršenja tog krivičnog djela ili pronalaženju i hvatanju učinioca krivičnog djela.



(2) Nakon poduzimanja mjera i aktivnosti iz stava (1) ovog člana, Uprava policije će odmah obavijestiti policijski organ nadležan za ta krivična djela.

#### **Član 90.**

##### **(Razmjena informacija u određenom slučaju)**

(1) Uprava policije razmjenjuje informacije s drugim policijskim organima u Bosni i Hercegovini ako oni smatraju takvu informaciju neophodnom ili ako bi korištenje te informacije pomoglo istražni postupak ili rad policije.

(2) Razmjena informacija se vrši u skladu sa Zakonom o zaštiti tajnih podataka i drugim zakonima i propisima.

#### **Član 91.**

##### **(Razmjena podataka)**

(1) Ministarstvo i Uprava policije mogu razmjenjivati podatke:

- a) sa drugim policijskim i ostalim nadležnim organima;
- b) sa nadležnim organima u svrhu uspostave i funkcioniranja baza podataka koje će koristiti svi policijski i nadležni organi u Bosni i Hercegovini;
- c) sa nadležnim organima u svrhu uspostave i funkcioniranja sistema razmjene podataka sa drugim policijskim i ostalim nadležnim organima u Bosni i Hercegovini;
- d) u druge svrhe u skladu sa zakonima i propisima;

(2) Podaci iz stava (1) ovog člana se odnose na poslove policijskih organa i Ministarstva i drugih nadležnih organa u Bosni i Hercegovini.

#### **Član 92.**

##### **(Pomoć u vanrednim situacijama)**

U slučaju prirodnih nepogoda, epidemija ili drugih vanrednih situacija, Ministarstvo može zatražiti i pružiti pomoć u pogledu resursa, opreme i ljudstva drugim kantonalnim ministarstvima unutrašnjih poslova, Federalnom ministarstvu unutrašnjih poslova, Obavještajno sigurnosnoj agenciji Bosne i Hercegovine, Ministarstvu unutrašnjih poslova Republike Srpske, Policiji Brčko Distrikta Bosne i Hercegovine, Državnoj agenciji za istrage i zaštitu i Graničnoj policiji Bosne i Hercegovine.

## **POGLAVLJE X – NADZOR NAD PROVOĐENJEM ZAKONA**

#### **Član 93.**

##### **(Nadležni organi za provođenje nadzora)**

Nadzor nad provođenjem ovog zakona i podzakonskih propisa donesenih na osnovu ovog zakona u Upravi policije vrši Ministarstvo, a u odnosu na finansijska sredstva Ministarstva i Uprave policije nadzor vrši Ministarstvo finansija.

## **POGLAVLJE XI – PRIJELAZNE I ZAVRŠNE ODREDBE**

#### **Član 94.**

##### **(Podzakonski propisi koji se donose uz saglasnost nadležnih tijela Skupštine Kantona)**

U roku od tri mjeseca od dana stupanja na snagu ovog zakona, radno tijelo Skupštine kantona nadležno za sigurnost će donijeti propis iz člana 66. ovog zakona.

#### **Član 95.**

##### **(Podzakonski propisi koje donosi Vlada Kantona)**

U roku od tri mjeseca od dana stupanja na snagu ovog zakona, Vlada Kantona će na prijedlog ministra donijeti sljedeće podzakonske propise:

- a) Uredbu o osiguranju određenih ličnosti i objekata u Kantonu (član 12.);
- b) Uredbu o vrsti i količini naoružanja i opreme Uprave policije (član 16.);
- c) Uredbu o disciplinskoj odgovornosti policijskog komesara (član 60.);
- d) Uredbu o radnim mjestima koje obavljaju državni službenici i namještenici pod posebnim uvjetima i odgovornostima (član 74.).

#### **Član 96.**

##### **(Podzakonski propisi koje donosi ministar)**

(1) U roku od tri mjeseca od dana stupanja na snagu ovog zakona, ministar će na prijedlog policijskog komesara donijeti sljedeće podzakonske propise:

- a) Pravilnik o uvjetima, načinu i postupku korištenja odobrenih finansijskih sredstava iz specijalne kase (član 6.);
- b) Pravilnik o postupanju policijskih službenika prema osobama lišenim slobode (član 13.);



- c) Instrukciju o pružanju pomoći drugim organima (član 14.);
- d) Pravilnik o izgledu, obilježavanju, registraciji i upotrebi vozila Ministarstva i Uprave policije (član 17.);
- e) Uputstvo o izvještavanju o poduzetim aktivnostima i događajima od značaja za sigurnost građana i interesa Kantona (član 26.);
- f) Pravilnik o pohvalama, priznanjima i nagradama koje se dodjeljuju organizacionim jedinicama i zaposlenicima Ministarstva i Uprave policije (član 78.).

(2) U roku od šest mjeseci od dana stupanja na snagu ovog zakona ministar će, uz saglasnost Vlade Kantona, donijeti Pravilnik o unutrašnjoj organizaciji Ministarstva (član 19.).

(3) U roku od tri mjeseca od dana stupanja na snagu ovog zakona ministar će, uz saglasnost Komisije za izbor i imenovanja Skupštine kantona, donijeti Pravilnik kojim se bliže uređuje postupak imenovanja i razrješenja članova Odbora (član 72. stav (2) ).

#### Član 97.

##### **(Postavljenje i raspored državnih službenika, i namještenika)**

Ministar i policijski komesar obavezni su, u skladu sa Pravilnikom o unutrašnjoj organizaciji Ministarstva propisom iz člana 96. stav (2) ovog zakona, izvršiti postavljenje i raspored državnih službenika i namještenika u skladu sa Zakonom o državnim službenicima i namještenicima u organima državne službe Unsko-sanskog kantona iz ukinutih organizacionih jedinica.

#### Član 98.

##### **(Prijelazne odredbe o statusu policijskog komesara, Nezavisnog odbora i Odbora za žalbe javnosti nakon stupanja na snagu ovog zakona)**

(1) Izuzetno od odredbi čl. 32., 38. i 72. ovog zakona, policijski komesar, članovi Nezavisnog odbora i Odbora za žalbe javnosti (Javno žalbeni biro), imenovani na tu poziciju u skladu sa zakonima i drugim propisima koji su bili na snazi prije stupanja na snagu ovog Zakona, ostaju na toj poziciji do isteka svog mandata.

(2) Stupanjem na snagu ovog zakona članovima Nezavisnog odbora imenovanim iz reda Ministarstva unutrašnjih poslova Unsko-sanskog kantona prestaje mandat.

#### Član 99.

##### **(Raspodjela sredstava)**

U roku od 12 mjeseci od dana stupanja na snagu ovog zakona, ministar i policijski komesar će donijeti odluku o diobnom bilansu opreme i sitnog inventara Ministarstva i Uprave policije.

#### Član 100.

##### **(Prestanak važenja ranijeg zakona)**

(1) Danom stupanja na snagu ovog zakona prestaje važiti Zakon o unutrašnjim poslovima Unsko-sanskog kantona („Službeni glasnik Unsko-sanskog kantona“, br. 1/97, 1/02, 6/02, 8/02 i 11/03).

(2) Podzakonski akti, doneseni na osnovu zakona iz stava (1) ovog člana, ostaju na snazi do donošenja novih podzakonskih akata.

#### Član 101.

##### **(Stupanje na snagu)**

Ovaj zakon stupa na snagu osmog dana od dana objavljivanja u „Službenom glasniku Unsko-sanskog kantona“.

Broj: 01-02-1-388/16      Predsjedavajući Skupštine  
25. augusta 2016. godine      Unsko-sanskog kantona  
B i h a ć      Nijaz Hušić, prof.

#### 644.

Na osnovu člana 11.n). A.V. Ustava Unsko - sanskog kantona - prečišćeni tekst („Službeni glasnik Unsko - sanskog kantona“ broj: 1/04 i 11/04) i člana 97. Poslovnika Skupštine Unsko - sanskog kantona („Službeni glasnik Unsko - sanskog kantona“ broj: 5/04) Skupština Unsko - sanskog kantona na 11. vanrednoj sjednici održanoj dana 25.08.2016.godine donijela je sljedeću

### **ODLUKU**

#### **I**

Skupština Unsko-sanskog kantona vraća Skupštini ŠPD „Unsko-sanske šume“ d.o.o. Bosanska Krupa na doradu Odluku broj: 019-1010-13/16 od 24.08.2016. godine, koja se odnosi na raspodjelu dobiti ostvarene radom i poslovanjem utvrđene u bilansu stanja ŠPD „Unsko- sanske šume“ d.o.o. Bosanska Krupa u dijelu koji se odnosi na raspored dobiti u Budžet Unsko- sanskog kantona za 2016. godinu u iznosu od 2.301.223,50 KM, iz razloga što se ista ne može provesti u skladu sa Zakonom o